



Coimisiún na Scrúduithe Stáit
State Examinations Commission

Scrúdú na hArdteistiméireachta, 2026

Gaeilge

Páipéar 2

Ardleibhéal

Dé Máirt 9 Meitheamh

Maidin 9:30 – 12:35

200 marc

**Ná tabhair an ceistpháipéar seo ar ais.
Ní chuirfear ar ais chuig Coimisiún na Scrúduithe Stáit é.**

Léigh na treoracha ar leathanach 3

Treoracha d'iarrthóirí

Ní mór do na hiarrthóirí cúram a dhéanamh de chruinneas na teanga.
Caillfear marcanna má bhítear faillitheach ann.

Freagair gach ceist (Ceist 1, Ceist 2, Ceist 3 agus Ceist 4).

Ceist 1:	Freagair Léamhthuisctint A (50 marc) agus Léamhthuisctint B (50 marc). Tá Ceist 1 - 5 ar aon mharc. Glacfar le freagraí i d'fhocail féin nó i bhfocail an tsleachta, de réir mar a éilítear sa cheist. Ní mór Ceist 6(b) a fhreagairt i d'fhocail féin, áfach.
Ceist 2:	Freagair Ceist 2A (30 marc) nó Ceist 2B (30 marc). 2A. Prós Ainmnithe Freagair ceist amháin as do rogha de 2A (a) nó 2A (b). nó 2B. Prós Roghnach Freagair ceist amháin as do rogha de 2B (a) nó 2B (b).
Ceist 3:	Freagair Ceist 3A (30 marc) nó Ceist 3B (30 marc). 3A. Filíocht Ainmnithe Freagair ceist amháin as do rogha de 3A (a) nó 3A (b). nó 3B. Filíocht Roghnach Freagair ceist amháin as do rogha de 3B (a) nó 3B (b).
Ceist 4:	An Litríocht Bhreise (40 marc) Freagair do rogha ceann amháin as Ceist 4 (A, B, C, D, E nó F).

Freagair Léamhthuiscint A agus Léamhthuiscint B anseo.

A – 50 marc

Léigh an sliocht seo a leanas agus freagair na ceistanna ar fad a ghabhann leis.

An tSiúr Stan – a saol agus a hoidhreacht

1. Fuair an tSiúr Stanislaus Ní Chinnéide, nó an tSiúr Stan mar ab fhearr aithne uirthi, bás ar an tríú lá de mhí na Samhna anuraidh. Chaith an tSiúr Stan a saol ar fad mar ghníomhaí sóisialta ag obair ar mhaithe le daoine faoi mhíbhuntáiste agus mar urlabhraí misniúil ar son chearta an duine agus ar son an chomhionannais. Bhí baint ag an tSiúr Stan le go leor eagraíochtaí agus í ag iarraidh na bearnaí i gcúram na ndaoine faoi mhíbhuntáiste a mhaolú, ach is é an carthanas Focus Ireland, a bhunaigh sí faoin ainm Focus Point ar dtús, an eagraíocht is mó a luaitear léi. Bhunaigh sí Focus Point in 1985 chun dul i ngleic le géarchéim na heaspa dídine i mBaile Átha Cliath ag an am. Is iomaí duine a léirigh ómós don tSiúr Stan ar ócáid a báis. Dúirt Uachtarán na hÉireann ag an am, Micheál D. Ó hUginn, gur ghníomhaigh sí gan fuacht gan faitíos ar son cearta daonna agus ar son an chomhionannais. Dúirt an Taoiseach, Micheál Ó Máirtín, gur thug an tSiúr Stan a saol ag labhairt amach ar son daoine ar an ngannchuid. Dúirt Príomhfheidhmeannach Focus Ireland, Pat Dennigan, gur bhean í an tSiúr Stan a chuir daoine eile chun tosaigh i gcónaí i ngach rud a rinne sí.

2. Rugadh Treasa Ní Chinnéide i bparóiste Lios Póil, Co. Chiarraí, ar an naoú lá déag de mhí an Mheithimh 1939. D'fhás sí aníos i dtimpeallacht inar mhothaigh sí ar a suaimhneas, saor agus sábháilte. Ba é an dearcadh sin ar an mbaile mar thearmann a spreag a cuid oibre le daoine gan dídean. Nuair a d'fhág Treasa an bhunscoil i Lios Póil, d'fhreastail sí ar an meánscoil i gClochar na Toirbhirte sa Daingean. Cé nach raibh saol na bhfuíoll ag a muintir féin, ní rabhadar ar an gcaolchuid ach an oiread. Bhí sé cloiste ag Treasa, áfach, go raibh roinnt páistí sna cathracha agus sna bailte móra a raibh drochbhail orthu de bharr bochtaineachta agus faillí. Theastaigh uaithi cabhrú leo. Nuair a bhí Treasa ocht mbliana déag d'aois, roghnaigh sí a bheith ina bean rialta. Chuaigh sí isteach i Siúracha na Carthanachta mar bhí sí tógtha leis an misean a bhí acu freastal ar na daoine is boichte sa tsochaí. Ghlac sí leis an ainm

'Stanislaus'. Go luath ina cuid nóibhíseachta, cuireadh ar thaithí oibre í ag cuidiú le bochtáin i mBaile Átha Cliath agus le himircigh Éireannacha in Hammersmith agus Paddington i Londain. B'oscailt súl don tSiúr Stan an obair sin leis na himircigh Éireannacha mar bhí an-chuid de na daoine sin beo bocht agus cheap sí roimhe sin go raibh saol níos fearr ag na hÉireannaigh a chuaigh ar imirce go Sasana.

3. Tar éis a cuid nóibhíseachta i dtús na 1960idí, chaith sí tamall ag obair i scoil agus i gclub óige i gClochar Shráid Stanhope i mBaile Átha Cliath. Ina dhiaidh sin, cuireadh í ag obair leis an Easpag Peter Birch i gCill Chainnigh. Easpag forásach, nua-aimseartha ba ea an tEaspag Birch. Bhí go leor de na luachanna céanna aige féin agus ag an tSiúr Stan agus chreid siad beirt go bhfuil an ceart ag gach duine a shaol a chaitheamh le dínit, beag beann ar a stádas sóisialta. Chabhraigh an tSiúr Stan leis an Easpag Birch Seirbhísí Sóisialta Chill Chainnigh a bhunú, eagraíocht cheannródaíoch a bhí ag tabhairt oibrithe deonacha agus gníomhaithe sóisialta le chéile chun a gcuid oibre a chomhordú agus a dhéanamh níos éifeachtaí. Chaith an tSiúr Stan fiche bliain i gCill Chainnigh agus, idir an dá linn, rinne sí céim san Eolaíocht Shóisialta sa Choláiste Ollscoile, Baile Átha Cliath, agus iarchéim ina dhiaidh sin in Ollscoil Mhanchain. Chuidigh an bunús acadúil sin lena cuid oibre sa mhéid gur thosaigh sí ag díriú ar leasú sóisialta bunaithe ar fhianaise.

4. D'fhill an tSiúr Stan ar Bhaile Átha Cliath in Earrach na bliana 1983. I mí Dheireadh Fómhair na bliana sin, bhí sí ina mac léinn taighde sa Choláiste Ollscoile, Baile Átha Cliath. Rinne sí féin agus grúpa cúntóirí an chéad taighde riamh ar an easpa dídine i measc na mban i mBaile Átha Cliath. Mar chuid den taighde sin, d'éist siad le scéalta pearsanta na mban sin ionas go bhféadfadh siad tuiscint a fháil ar an easpa dídine ó thaithí an duine a bhí gan dídean. Is as an taighde sin a d'fhás Focus Point (Focus Ireland

anois) i mí Mheán Fómhair 1985. Ba é an fhís a bhí ag an tSiúr Stan don eagraíocht nua ná seirbhísí ar ardchaighdeán a chur ar fáil chun freastal ar riachtanais na ndaoine gan dídean. Ba é an clochar ar Shráid Stanhope, a bhronn Siúracha na Carthanachta uirthi, an suíomh don chéad tionscadal tithíochta. Bhí maoiniú ar cheann de na dúshláin ba mhó a bhí roimpi ag an am ach d'iarradh sí cúnamh airgid arís is arís eile ar airí rialtais chun an fhadhb sin a sháru, agus ní ghlacadh sí riamh le diúltú. Faoina ceannaireacht, d'fhás Focus Ireland go tapa agus leathnaigh sé amach ar fud na tíre. Sa lá atá inniu ann, is é an eagraíocht dheonach is mó in Éirinn é atá ag obair ar son daoine gan dídean. 5. Chuaigh fís na Siúrach Stan níos faide ná easpa dídine. Sa bhliain 1998, bhunaigh sí The Sanctuary, ionad machnaimh agus spioradáltachta, i lár chathair Bhaile Átha Cliath. In 2001, mar fhreagra ar an líon ard inimirceach	a bhí ag teacht go hÉirinn, bhunaigh sí an Chomhairle um Inimircigh in Éirinn chun faisnéis, cúnamh dlíthiúil agus tacaíochtaí a chur ar fáil d'inimircigh agus chun cabhrú leo a bheith mar chuid de phobal na tíre seo. Timpeall an ama chéanna bhí sí gníomhach i mbunú na Nuálaithe Sóisialta Óga, tionscnamh a bhfuil sé mar aidhm leis daoine óga a spreagadh le bheith ina saoránaigh ghníomhacha agus iad ag dul i ngleic le ceisteanna sóisialta ina bpobail féin. Is iomaí onóir náisiúnta agus idirnáisiúnta a bronnadh ar an tSiúr Stan mar aitheantas ar a cuid oibre chun sochaí níos cothroime a bhaint amach in Éirinn. In 1997, cheap Uachtarán na hÉireann ag an am, Máire Mhic Ghiolla Íosa, an tSiúr Stan ina ball den Chomhairle Stáit chun cúnamh agus comhairle a chur ar fáil di nuair a d'iarradh sí a leithéid. Beidh cuimhne ar an tSiúr Stan mar bhean a chreid go diongbháilte i gcónaí san obair a bhí ar siúl aici.
---	---

Ceisteanna

- (a)** Conas a chaith an tSiúr Stan a saol ar fad? (Alt 1)

(b) (i) Cén fáth ar bhunaigh an tSiúr Stan Focus Point in 1985? (Alt 1)

(ii) Cad a dúirt Príomhfheidhmeannach Focus Ireland, Pat Dennigan, faoin tSiúr Stan? (Alt 1)

(7 marc)
- (a)** Conas a mhothaigh Treasa sa timpeallacht inar tógadh í? (Alt 2)

(b) (i) Cén fáth a ndeachaigh Treasa isteach i Siúracha na Carthanachta nuair a roghnaigh sí a bheith ina bean rialta? (Alt 2)

(ii) Cén fáth arbh oscailt súl don tSiúr Stan an obair a rinne sí le himircigh Éireannacha i Londain? (Alt 2)

(7 marc)
- (a)** Cén rud ar chreid an bheirt, an tEaspag Birch agus an tSiúr Stan, ann? (Alt 3)

(b) (i) Cén fáth a ndeirtear go raibh Seirbhísí Sóisialta Chill Chainnigh ceannródaíoch? (Alt 3)

(ii) Conas a chuidigh an bunús acadúil le hobair na Siúrach Stan? (Alt 3)

(7 marc)
- (a)** Cén fáth ar éist an tSiúr Stan agus na taighdeoirí le scéalta pearsanta na mban gan dídean i mBaile Átha Cliath? (Alt 4)

(b) (i) Cén fhís a bhí ag an tSiúr Stan don eagraíocht Focus Point? (Alt 4)

(ii) Cad a dhéanadh an tSiúr Stan chun fadhb an mhaoinithe a sháru? (Alt 4)

(7 marc)
- (a)** Conas a chabhraigh an Chomhairle um Inimircigh in Éirinn leis na hinimircigh a bhí ag teacht chuig Éirinn? (Alt 5)

(b) (i) Cén aidhm atá leis an tionscnamh na Nuálaithe Sóisialta Óga? (Alt 5)

(ii) Cén fáth ar cheap Uachtarán na hÉireann ag an am, Máire Mhic Ghiolla Íosa, an tSiúr Stan ina ball den Chomhairle Stáit? (Alt 5)

(7 marc)
- (a)** Aimsigh sampla den bhriathar saor san Aimsir Chaite in Alt 2 **agus** sampla de bhreischéim na haidiachta in Alt 5.

(b) 'Chaith an tSiúr Stan a saol ar fad ag cabhrú le grúpaí éagsúla.' Tabhair **dhá** phointe eolais, **i d'fhocail féin**, as an sliocht a léiríonn fírinne an ráitis sin, dar leat. (Is leor **60** focal.)

(15 mharc)

Léigh an sliocht seo a leanas agus freagair na ceistanna **ar fad** a ghabhann leis.

An mearfhaisean ag dul as faisean

1. Is ábhar tráthúil é an mearfhaisean sa lá atá inniu ann. Is éard is brí leis an téarma ‘mearfhaisean’ ná éadaí a tháirgeadh go tapa ar phraghsanna an-íseal. Mar thoradh ar phraghsanna ísle agus rogha leathan éadaí a bheith ar fáil, tá daoine ag ceannach i bhfad níos mó éadaí. De bharr an éilimh aird atá ar an mearfhaisean, déantar méideanna ollmhóra éadaí, go minic ar chaighdeán íseal. Leanann na comhlachtaí mearfhaisin na treochtaí faisin is mó ar na meáin shóisialta agus déanann siad staidéar ar phatrúin ceannachán a gcuid custaiméirí féin chun cabhrú leo cinneadh a dhéanamh faoi na cineálacha éadaí ba chóir a chur ar fáil. Ach caithfear an cheist a chur, cén dochar atá á dhéanamh ag déantús na méideanna móra éadaí sin don chomhshaol? Tá sé ag truailliú an uisce le micreaphlaistigh, ag scaoileadh astaíochtaí arda carbóin isteach san atmaisféar agus ag úsáid na mílte lítear uisce. Is minic nach gcaitear na héadaí sin ach uair nó dhó agus tá rátaí ísle athchúrsála ag baint leo, rud a chruthaíonn an-chuid dramhaíola. Chomh maith le ceist an chomhshaoil, is cúis imní cearta na n-oibrithe sna monarchana. Bíonn droch-chúinsí oibre in go leor de na monarchana sin agus tuilleann na hoibrithe pá íseal.

2. Creidtear go bhfuil ‘an faisean ciorclach’ ar cheann de na réitigh is fearr a d’fhéadfadh a bheith ann le dul i ngleic leis an mearfhaisean. Ciallaíonn ‘faisean ciorclach’ éadaí a mhaireann níos faide, atá déanta as ábhair in-athchúrsáilte, agus ar féidir iad a athúsáid nó a dheisiú. Tá go leor deiseanna ag baint leis an bhfaisean ciorclach. Déantar éadaí ar ardchaighdeán as ábhair inbhuanaithe, laghdaítear an lorg carbóin agus na leibhéil dramhaíola agus sábháiltear acmhainní nádúrtha, ar nós uisce. Le blianta beaga anuas, tá rialtais ag iarraidh an faisean ciorclach a chur chun cinn. In 2022, seoladh Straitéis an Aontais Eorpaigh um Theicstílí Inbhuanaithe agus Ciorclacha. De réir na straitéise sin, beidh na héadaí a chuirfear ar mhargadh an Aontais Eorpaigh faoin mbliain 2030 fadsaolach, in-athchúrsáilte agus indeisithe den chuid is mó, agus déanfar iad de réir modhanna déantúsaíochta cothroma. Chomh

maith leis an straitéis sin, tá an Coimisiún Eorpach ag iarraidh ar gach ballstát a gcóras bailithe éadaí a fheabhsú, rud a bhfuil tábhacht ag baint leis ó thaobh deiseanna athúsáidte éadaí a mhéadú.

3. Anseo in Éirinn, tá go leor oibre ar siúl chun an faisean ciorclach a chur chun cinn. In 2024, sheol an rialtas an feachtas faisin inbhuanaithe ‘Iompaigh an Treocht Droim ar Ais’. San fheachtas sin, iarrtar ar dhaoine níos lú éadaí a cheannach, iad a chaitheamh arís nó iad a roinnt. Is feachtas oideachasúil de chuid Chlár na Scoileanna Glasa é an clár Let’s Fix Fashion ina n-iarrtar ar dhaoine óga aghaidh a thabhairt ar thionchair dhiúltacha an mhearfaisin. Spreagtar daoine óga chun athmhachnamh a dhéanamh ar an gcaoi a ndéantar éadaí, a gcaitear iad agus a bhfaightear réidh leo. Eagraítear ceardlanna, seimineáir agus malartuithe éadaí faoi stiúir scoláirí chun aird a tharraingt ar an dramhaíl faisin agus chun roghanna inbhuanaithe faisin a chur chun cinn. Sa rannóg Rediscover Fashion san Ionad Náisiúnta don Gheilleagar Ciorclach i mBaile Munna, cuirtear cúrsaí oiliúna ar siúl chun na scileanna a mhúineadh do dhaoine le héadaí a athúsáid, a dheisiú agus a athdhearadh.

4. Tá go leor comhlachtaí éadaí Éireannacha ag iompú ar an bhfaisean inbhuanaithe. Tá siad ag baint úsáid as amhábhair inbhuanaithe, ag dearadh éadaí ar bhealach a dhéanfaidh athúsáid agus athchúrsáil níos éasca, agus ag glacadh modhanna táirgthe atá neamhdhíobhálach don chomhshaol chucu féin. Oibríonn na comhlachtaí sin lena soláthraithe chun cleachtais chothroma saothair a chinntiú. Úsáideann an comhlacht éadaí fóillíochta Human Collective cadás orgánach agus poileistear athchúrsáilte chun a gcuid éadaí a tháirgeadh. Tá an comhlacht Human Collective deimhnithe mar chomhlacht Fair Wear mar cinntíonn siad cúinsí cothroma oibre dá gcuid fostaithe. Úsáideann an-chuid dearthóirí modhanna deartha atá inbhuanaithe agus a laghdaíonn dramhaíl. Dearann siad a gcuid feisteas as fabraicí nádúrtha, ar nós bréidín nó olla, nó as ábhair sheanchaite, mar shampla, leathar as craiceann éisc. Tá cáil bainte amach ag an dearthóir Aoife McNamara mar cheannaire i dtionscal an fhaisin inbhuanaithe. Úsáideann

sise snáithíní nádúrtha, ní tháirgeann sí ach líon teoranta ball éadaigh agus tá sí an-airdeallach ar an gcomhshaol ina cuid modhanna oibre. Ghnóthaigh sí dearbhú B Corporation, caighdeán idirnáisiúnta do chomhlachtaí a chomhlíonann na leibhéil is airde ó thaobh freagracht shóisialta agus ó thaobh an chomhshaoil de.

5. Tá a gcúl tugtha ag cuid mhór daoine in Éirinn leis an mearfhaisean. Tá siad ag roghnú brandaí faisin inbhuanaithe. Ceannaíonn an-chuid daoine éadaí athlámhe i siopaí carthanachta, i siopaí éadaí seanré agus ar na hardáin athdhíola ar líne. Faigheann daoine éadaí ar cíós nó ar iasacht. Déanann daoine eile éadaí a mhalartú le chéile. Tá go leor comórtas á reáchtáil ina gcuirtear dúshláin roimh dhearthóirí éadaí nua, faiseanta a dhéanamh as seanéadaí agus

as ábhair athchúrsáilte eile. Is é Junk Kouture an comórtas faisin inbhuanaithe is mó ar domhan do dhaoine óga. Tugann an comórtas sin deis do dhaoine óga a bheith cruthaitheach agus feistis a dhearadh as ábhair athchúrsáilte. Anuraidh, taispeánadh feistis iontach déanta as buidéil bhainne phlaisteacha, as cannaí alúmanaim agus as dramhpháipéar. Tá fiontair ar fud na tíre ag glacadh leis an bhfaisean ciorclach. Is fiontar sóisialta rathúil é CycleUp i Ros Comáin a dhéanann uaschúrsáil ar dhramhábhair agus ar earraí seanchaite chun ábhair nua a dhéanamh díobh. Bhuaigh siad an gradam sa rannóg ‘an Aeráid agus an Comhshaol’ ag Gradaim Náisiúnta na bhFiontar Sóisialta, 2025, mar aitheantas ar an dea-thionchar atá acu ar an gcomhshaol agus ar an ngeilleagar áitiúil.

Ceisteanna

1. (a) Cad is brí leis an téarma ‘mearfhaisean’? (Alt 1)
 (b) (i) Scríobh síos rud **amháin** a dhéanann na comhlachtaí mearfhaisin chun cabhrú leo cinneadh a dhéanamh faoi na cineálacha éadaí ba chóir a chur ar fáil. (Alt 1)
 (ii) Luaigh **dhá** bhealach a bhfuil déantús na méideanna móra éadaí ag déanamh dochar don chomhshaol. (Alt 1)
 (7 marc)
2. (a) Cad a chiallaíonn ‘faisean ciorclach’? (Alt 2)
 (b) (i) Luaigh **dhá** dheis a bhaineann leis an bhfaisean ciorclach. (Alt 2)
 (ii) Scríobh síos **dhá** rud faoi na héadaí a chuirfear ar mhargadh an Aontais Eorpaigh faoin mbliain 2030 de réir na Straitéise um Theicstílí Inbhuanaithe agus Ciorclacha. (Alt 2)
 (7 marc)
3. (a) Cad a iarrtar ar dhaoine a dhéanamh de réir an fheachtais ‘Iompaigh an Treocht Droim ar Ais’? (Alt 3)
 (b) (i) Cén fáth a n-eagraítear ceardlanna, seimineáir agus malartuithe éadaí faoi stiúir scoláirí mar chuid den fheachtas oideachasúil Let’s Fix Fashion? (Alt 3)
 (ii) Cad a mhúintear ar na cúrsaí oiliúna sa rannóg Rediscover Fashion san Ionad Náisiúnta don Gheilleagar Ciorclach i mBaile Munna? (Alt 3)
 (7 marc)
4. (a) Scríobh síos **dhá** rud atá á ndéanamh ag go leor comhlachtaí éadaí Éireannacha a léiríonn go bhfuil siad ag iompú ar an bhfaisean inbhuanaithe. (Alt 4)
 (b) (i) Cén fáth a bhfuil an comhlacht Human Collective deimhnithe mar chomhlacht Fair Wear? (Alt 4)
 (ii) Scríobh síos **dhá** chúis a bhfuil cáil bainte amach ag an dearthóir Aoife McNamara mar cheannaire i dtionscal an fhaisin inbhuanaithe. (Alt 4)
 (7 marc)
5. (a) Scríobh síos **dhá** bhealach a bhfuil a gcúl tugtha ag cuid mhór daoine in Éirinn leis an mearfhaisean. (Alt 5)
 (b) (i) Cén deis a thugann an comórtas Junk Kouture do dhaoine óga? (Alt 5)
 (ii) Cad a dhéantar sa tionscnamh CycleUp? (Alt 5)
 (7 marc)
6. (a) Aimsigh sampla den bhriathar saor san Aimsir Láithreach in Alt 1 **agus** sampla de bhriathar sa Mhodh Coinníollach in Alt 2.
 (b) Bunaithe ar an eolas sa sliocht thuas, an bhfuil tú dóchasach go bhfuil deireadh ag teacht leis an mearfhaisean sa tír seo? Tabhair **dhá** fháth, **i d’fhocail féin**, as an sliocht, mar thacaíocht le do fhreagra. (Is leor **60** focal.)
 (15 mharc)

PRÓS AINMNITHE nó PRÓS ROGHNACH

30 marc

Freagair Ceist 2A (Prós Ainmnithe) **nó** Ceist 2B (Prós Roghnach).

2A. Prós Ainmnithe

Freagair do rogha ceann **amháin** de (a) **nó** (b) thíos.

- (a) Freagair an cheist thíos ar an scannán *Cáca Milis* **nó** ar an dráma *An Lasair Choille*.

Cáca Milis

‘Tugtar léiriú sa scannán *Cáca Milis* ar an gcineál duine í Catherine tríd an gcaidreamh a bhí aici lena máthair agus leis an bhfear dall, Paul.’

Déan plé ar an ráiteas sin.

(30 marc)

nó**An Lasair Choille**

‘Tugtar léiriú sa dráma *An Lasair Choille* ar an saol atá ag an bhfear óg, Séamas, le Micil agus ar an athrú a thagann ar thuiscint Shéamais ar an saol sin de bharr chuairt Mhíoda.’

Déan plé ar an ráiteas sin.

(30 marc)

nó

- (b) Freagair an cheist thíos ar an ngearrscéal *Dís*.

Dís

‘Tugtar léiriú sa ghearrscéal *Dís* ar an gcineál saoil atá ag bean Sheáin agus ar an dearcadh atá aici ar an saol sin.’

Déan plé ar an ráiteas sin.

(30 marc)

2B. Prós Roghnach

Freagair do rogha ceann **amháin** de (a) **nó** (b) thíos.

Níl cead aon ábhar a bhaineann le Prós Ainmnithe a úsáid i bhfreagra ar an bPrós Roghnach.

- (a) Freagair an cheist thíos ar an scannán roghnach **nó** ar an dráma roghnach.

Maidir leis an **scannán roghnach** a ndearna tú staidéar air le linn do chúrsa, déan plé ar an léargas a thugtar dúinn ar iompar an phríomhcharachtair (na príomhphearsan) agus ar an gcaoi a dtéann iompar an duine sin i bhfeidhm ar imeachtaí an scannáin.

Ní mór teideal an scannáin sin, mar aon le hainm an scríbhneora, a scríobh síos go cruinn.

(30 marc)

nó

Maidir leis an **dráma roghnach** a ndearna tú staidéar air le linn do chúrsa, déan plé ar an léargas a thugtar dúinn ar iompar an phríomhcharachtair (na príomhphearsan) agus ar an gcaoi a dtéann iompar an duine sin i bhfeidhm ar imeachtaí an dráma.

Ní mór teideal an dráma sin, mar aon le hainm an scríbhneora, a scríobh síos go cruinn.

(30 marc)

nó

- (b) Freagair an cheist thíos ar an ngearrscéal roghnach.

Maidir le **gearrscéal roghnach** a ndearna tú staidéar air le linn do chúrsa, déan plé ar an léargas a thugtar dúinn ar shaol agus ar mheon an phríomhcharachtair (na príomhphearsan) ó thús deireadh an ghearrscéil.

Ní mór teideal an ghearrscéil sin, mar aon le hainm an údair, a scríobh síos go cruinn.

(30 marc)

FILÍOCHT AINMNITHE nó FILÍOCHT ROGHNACH

30 marc

Freagair Ceist 3A (Filíocht Ainmnithe) **nó** Ceist 3B (Filíocht Roghnach).

3A. Filíocht Ainmnithe

Freagair do rogha ceann **amháin** de (a) **nó** (b).

(a) An tEarrach Thiar

- (i) 'Sa dán *An tEarrach Thiar* (thíos), úsáideann an file íomhánna chun saol an oileáin le linn a óige a chur os ár gcomhair.' É sin a phlé. (15 mharc)
- (ii) Cén éifeacht atá ag athrá na bhfocal 'San Earrach thiar' ag deireadh gach véarsa, dar leat? (Is leor pointe **amháin** eolais as an dán mar thacaíocht le do fhreagra.) (6 mharc)
- (iii) Cé a chum an dán seo? Scríobh nóta gairid ar shaol **agus** ar shaothar an fhile sin. (9 marc)

An tEarrach Thiar

Fear ag glanadh cré
De ghímseán spáide
Sa gciúineas shéimh
I mbrothall lae:
Binn an fhuaim
San Earrach thiar.

Fear ag caitheadh
Cliabh dhá dhroim,
Is an fheamainn dhearg
Ag lonrú
I dtaitneamh gréine
Ar dhuirling bháin:
Niamhrach an radharc
San Earrach thiar.

Mná i locháin
In íochtar diaidh-thrá,
A gcótaí craptha,
Scáilí thíos fúthu:
Támh-radharc síothach
San Earrach thiar.

Toll-bhuillí fanna
Ag maidí rámha,
Currach lán éisc
Ag teacht chun cladaigh
Ar ór-mhuir mhall
I ndeireadh lae;
San Earrach thiar.

(b) Mo ghrá-sa (idir lúibíní)

- (i) ‘Roghnaíonn an file íomhánna ón nádúr chun léiriú a thabhairt dúinn ar chuma agus ar thréithe an fhir sa dán *Mo ghrá-sa (idir lúibíní)* (thíos).’ É sin a phlé. (15 mharc)
- (ii) Cén éifeacht a bhaineann le húsáid na lúibíní sa dán seo, dar leat?
(Is leor pointe **amháin** eolais as an dán mar thacaíocht le do fhreagra.) (6 mharc)
- (iii) Cé a chum an dán seo? Scríobh nóta gairid ar shaol **agus** ar shaothar an fhile sin. (9 marc)

Mo ghrá-sa (idir lúibíní)

Níl mo ghrá-sa
mar bhláth na n-airní
a bhíonn i ngairdín
(nó ar chrann ar bith)

is má tá aon ghaol aige
le nóiníní
is as a chluasa a fhásfaidh siad
(nuair a bheidh sé ocht dtroigh síos)

ní haon ghlaise cheolmhar
iad a shúile
(táid róchógarach dá chéile
ar an gcéad dul síos)

is más slim é síoda
tá ribí a ghruaige
(mar bhean dhubh Shakespeare)
ina WIRE deilgní.

Ach is cuma san.
Tugann sé dom
úlla
(is nuair a bhíonn sé i ndea-ghiúmar
caora fíniúna).

3B. Filíocht Roghnach

Freagair do rogha ceann **amháin** de (a) **nó** (b) thíos.

Níl cead aon ábhar a bhaineann le Filíocht Ainmnithe a úsáid i bhfreagra ar an bhFilíocht Roghnach.

(a)

- (i)** Maidir le **dán nua-aimseartha roghnach** a ndearna tú staidéar air le linn do chúrsa, scríobh síos príomhthéama an dáin, dar leat.
Déan plé ar an bhforbairt a dhéantar ar an bpríomhthéama sin ó thús deireadh an dáin. (15 mharc)
- (ii)** Cén mothúchán is láidre atá sa dán, dar leat?
(Is leor pointe **amháin** eolais as an dán mar thacaíocht le do fhreagra.) (6 mharc)
- (iii)** Cé a chum an dán seo? Scríobh nóta gairid ar shaol **agus** ar shaothar an fhile sin. (9 marc)

nó

(b)

- (i)** Maidir le **dán nua-aimseartha roghnach** a ndearna tú staidéar air le linn do chúrsa, scríobh síos príomhthéama an dáin, dar leat.
Déan plé ar an léiriú a thugtar ar an bpríomhthéama sin ó thús deireadh an dáin. (15 mharc)
- (ii)** An bhfuil teideal an dáin oiriúnach do phríomhthéama an dáin, dar leat?
(Is leor pointe **amháin** eolais as an dán mar thacaíocht le do fhreagra.) (6 mharc)
- (iii)** Cé a chum an dán seo? Scríobh nóta gairid ar shaol **agus** ar shaothar an fhile sin. (9 marc)

LITRÍOCHT BHREISE

40 marc

Freagair do rogha ceann **amháin** as Ceist 4 (A, B, C, D, E nó F) thíos.

4A. An Triail

‘Sa dráma *An Triail*, fulaíngíonn an cailín óg, Máire Ní Chathasaigh, go mór de bharr rialacha na sochaí ag an am.’

Déan plé ar an ráiteas sin.

(40 marc)

4B. A Thig Ná Tit Orm

Déan plé ar an **dá** thréith is mó, dar leat, a bhaineann le Maidhc Dainín mar a léirítear iad sa dírbheathaisnéis *A Thig Ná Tit Orm*.

(40 marc)

4C. Tóraíocht Dhiarmada agus Ghráinne

‘Cuirtear Diarmaid romhainn mar laoch dílis tragóideach sa *Tóraíocht*.’

Déan plé ar an ráiteas sin.

(40 marc)

4D. Gafa

‘Tugtar léiriú dúinn sa sliocht as an úrscéal *Gafa* ar bhriseadh croí Eithne, an mháthair, agus í ag plé le handúil a mic, Eoin, agus leis an easpa tacaíochta óna fear céile, Breandán.’

Déan plé ar an ráiteas sin.

(40 marc)

4E. Canary Wharf

‘Sa scéal *Cúrsa Eitilte*, tugtar léiriú dúinn ar an gcaoi ar éirigh le Theo na deacrachtaí go léir a cuireadh roimhe a shárú agus é ar a bhealach chun bualadh le Alana.’

Déan plé ar an ráiteas sin.

(40 marc)

4F. Dánta Breise – Colmáin

Freagair **(i)**, **(ii)** agus **(iii)** thíos.

(i) Cad é príomhthéama an dáin *Colmáin* (thall), dar leat?

Déan plé ar an bhforbairt a dhéantar ar an bpríomhthéama sin ó thús deireadh an dáin.

(20 marc)

(ii) A bhfuil i gceist leis na línte seo a mhíniú:

Ar na laethe úd a mhothaíodh sé dáimh as an ghnáth
leis na colmáin, bhíodh iontas an domhain air
nach ndéanfadh siad cuideachta leis i dtráth ná in antráth.

(10 marc)

(iii) An bhfuil trua agat do chás an chait sa dán? Tabhair **dhá** fháth le do fhreagra.

Bíodh tagairtí cruinne agat do théacs an dáin i do fhreagra.

(10 marc)

Colmáin

i gcead do Sigurdur Pálsson

An cat úd ar an seachtú hurlár de theach
ard cathrach, shíl sé ansiúd ina áras spéire
gur colmáin a bhí ann ó dhúchas.

Ó saolaíodh é ba é an seachtú hurlár –
crochta ansiúd idir an saol is an tsíoraíocht –
a bhaile agus a bhuanchónaí.

Ní fhaca sé a mhacasamhail féin ariamh,
cat dá dhéanamh, dá dhath, dá dhreach.
Ní fhaca sé ach daoine agus colmáin ar an aoirdeacht.

Shíl sé ar dtús gur duine a bhí ann,
gur ionann dó ina dhóigh agus ina chosúlacht
leo siúd ar dhá chois a bhí ina thimpeall.
Chuirfeadh sé naipcín fána bhráid
agus shuíodh sé ag an mbord go béasach
le greim bídh a ithe le lánúin óg an tí.
Ní raibh de thoradh air sin ach scread eitigh.
Thógfaí ar shiúl é láithreach
agus dhéanfaí prácás bídh as canna stáin
a shá go míbhéasach faoina shoc.

Is minic a shuíodh sé ina aonar
ar leac na fuinneoige, ag féachaint
ar na colmáin nach dtiocfadh ina láthair.
Amanta theastaigh uaidh téaltú chucu
go ciúin, súgradh leo go binn;
a chrúb a chur iontu ar son grinn.
Ar na laethe úd a mhothaíodh sé dáimh as an ghnáth
leis na colmáin, bhíodh iontas an domhain air
nach ndéanfadh siad cuideachta leis i dtráth ná in antráth.

Sa deireadh, lá buí Bealtaine le luí gréine,
chinn sé léim an cholmáin a thabhairt ó leac na fuinneoige
leis na heiteoga a bhí in easbaidh air ... faraoir.

An lá a cuireadh i dtalamh é i bpaiste créafóige
sa chúlchlós, a chorp beag ina phraiseach,
bhí colmáin ag cuachaireacht ó gach leac fuinneoige.

Níl aon ábhar scrúdaithe ar an leathanach seo

Níl aon ábhar scrúdaithe ar an leathanach seo

Admhálacha

Téacsanna

Leathanaigh 4-5: <https://www.srstan.ie>

Sister Stan. *The Road Home*. Londain: Transworld Ireland, 2011.

<https://www.rte.ie/news/nuacht/2025/1103/1541891-moladh-mor-faighite-ag-an-tsiur-stanislaus/>

Leathanaigh 6-7: <https://www.gov.ie/ga/an-roinn-aeraide-fuinnimh-agus-comhshaoil/preaseisiuinti/failtinn-an-taire-smyth-roimh-fheachtas-ina-spreagtar-an-faisean-ciorclach-ar-la-domhanda-na-dteicstili-ciorclacha/>

<https://www.gov.ie/ga/an-roinn-aeraide-fuinnimh-agus-comhshaoil/feachtais/iompaigh-an-treocht-droim-ar-ais/>

<https://greenschoolsireland.org>the-programme>projects>lets-fix-fashion>

<https://www.rediscoverycentre.ie/about/social-enterprise/rediscover-fashion/>

<https://wearehumancollective.com>

<https://aoifemcnamara.com>

<https://junkkouture.com>

<https://www.cycleup.ie>

Ná tabhair an ceistpháipéar seo ar ais.

Ní chuirfear ar ais chuig Coimisiún na Scrúduithe Stáit é.

Fógra cóipchirt

D'fhéadfadh sé go bhfuil téacsanna nó íomhánna sa scrúdpháipéar seo nach é Coimisiún na Scrúduithe Stáit úinéir an chóipchirt orthu, agus d'fhéadfadh sé gur athchóiríodh iad, chun críoch an mheasúnaithe, gan cead na n-údar a fháil roimh ré. Ullmhaíodh an scrúdpháipéar seo de réir alt 53(5) den Acht Cóipchirt agus Ceart Gaolmhar, 2000. Ní údaraítear aon úsáid dá éis chun aon chríche ach amháin chun na críche a bhfuil sé beartaithe chuici. Ní ghlacann an Coimisiún aon dliteanas as sárú ar bith ar chearta tríú páirtí a eascraíonn as dáileadh nó úsáid neamhúdraithe an scrúdpháipéir seo.

Scrúdú na hArdteistiméireachta – Ardleibhéal

Gaeilge – Páipéar 2

Dé Máirt 9 Meitheamh

Maidin 9:30 – 12:35